

续谱后记

公元一九九三年春本族志纯 维凡 玉海 荣海 锦云 正求 国运 均涛等有志之士为保持我族历史之全貌把中断半个多世纪的族谱重新连接起来组织发起续修编纂新谱为本族宗室办了一件大事

正本清源追溯黄氏宗族发展之历史她与伟大光荣的中华民族一样有着几千年的文明发展史自鼻祖陆终问世于夏商之朝至今黄氏后代在中华沃土上繁衍生息延绵不断发展到一百有余世代数以万计之人丁居百姓之林第八位在历史发展的长河中我族名流百出其业绩流芳万代诸于宋氏著名诗人吾祖龙图阁大学士庭坚公清代翰林院士黄秀近代民主革命先驱黄兴直至现代中央政府重要官员黄华 黄镇等黄氏宗族成员出现在中国历代政治舞台上乃我族同胞之荣今将濒临失传之族谱重新修纂并赋以新的内容其意义之重大

续修族谱其目的在于弘扬先辈艰苦创业勤

俭治安之精神真诚团结互敬互助之美德严规治族律己诲人之家风以激励后辈向先辈学习继承先辈之大志同心同德为振兴黄氏宗族繁荣后代为建设有中国特色的社会主义而努力奋斗

此次续谱工程宏巨涉及面广有五大支系联修时间之长达七月余耗资之多在万元以上为历届修谱所不及由于此届修谱距上届修谱时间太久加之人丁分散情况复杂从集资料工作量大对修谱增加了难度然修谱小组人员顶风冒雨置酷暑炎天而不顾收集资料筹措资金四处奔波把所有资料详细记录在卷同时修谱小组还千方百计追本溯源群策群力排除一个个难点疑点确保新谱的准确性为进行印刷奠定了基础对于续谱小组全体工作人员的辛勤劳动和簋口镇桥埠村姜庭芳等师傅精心排印谱速告竣我代表本族在外人员表示崇高的敬意和衷心的感谢由于客观原因新谱中难免有不全之处敬请本族各界人士谅解

本族成员甲联撰写

一九九三年七月十五日于岳阳

帝元门领谱名单（十修）

凌波	维凡	桂胜	忠仁	桂芝
文斌	旺秋	建新	锦来	湖平
立志	辉林	敏忠		

民国三十年的谱仕公正邦公管一套年老后
交爱华公保管文革后公元一九六八年爱华公歿
杨娘再交敏忠保管现该七卷族谱仍交敏忠管理
赠送谱箱一只

谱序

修谱巨事也合修全帙谱尤巨也我族自轩辕受氏江夏蜚声历汉唐宋元明簪纓仕宦代有名人典籍昭然何容重赘厥后由平江迁九峰之宗忠公及迁湘邑之翕庭公至我仲福公复由湘邑南林瓦子塘徙居于巴陵荷塘历年世代俱一脉继承谱牒至今已达四修观其始合而分既分复合复合又分载在家乘者数觐其谱之分合何多变幻也辛巳春湘邑诸贤士辱临敝分以收族大义主张合修全帙相商彼来此往意志相符决以合修为原则詎秋季以国难当头外夷犯境旋驾白约梓才等仍赴湘邑磋商乃老祠诸贤士发生合修谱费浩大争论多寡返家后召集父老讨论款项分合何出何从父老偕以费浩难合不如以分修而得便宜云云志忠与驾白等沐先人等泽稍识诗书一因公款困难动多掣肘二因先人厚望不能达到触繁之挚劳责推谁于是披阅旧谱辨义类考是非订讹误别清浊信者存之疑者阙之删繁就简纪旧增新上稽一脉之薪传如水有源而木有本下启百代之支派似璧相合而

珠相联始纪玘公终逮第派因根寻枝随流溯源俱有仍临周旋蹂躪草正谱稿时启时藏幸先祖默鉴未遭秦灰之祸延至壬午仲春才得结束工竣此修谱事巨如是呜呼暴风酷日国繫苞桑地成焦土人困流离谱之修既不容缓又岂可轻忽也然门閭微弱士子晨星经济绌艰事儿业胥窃以駑駘之质难附骥尾之后栝橈之水莫解车薪之危故此心存惕厉肩荷千钧虽霜天永夜细心研究稽考以克尽其职无忝续修之雅望也继自今修谱之后愿与吾合族人等修其孝弟忠信以爱亲敬长为先务崇尚礼义廉耻以立品修行为良图戒横暴去欺侮抗强权张公理诵诗读书鑿井耕田庶可扬名而显亲守业以成家由是五教遂三纲立身修家齐伦敦族睦继承先志丕振书香恢复合修全帙之巨事先人之厚望以与同源种族共藏成斯志耳略陈固陋谨撰以序云

裔孙春袍志忠顿首撰

谱序

自芦沟桥之变起战争之祸烈分奔离析去国怀乡诚恐一旦华胄沦夷披发左衽徙他乡抛骨肉众散亲离士君子欲联统系之血脉集全家之子姓各亲其亲各长其长欢萃一堂盖难言之矣吾于斯世深有慨焉所幸敌驻新墙天堑为界使我祖孙父子昆弟朝夕相亲较之陷地不尤幸中之幸也爰夫我祖仲福公由明季迁居此地虽不敢言巨族然星棋罗列瓜衍椒绵散居各村者亦复不少先辈深思熟虑恐世系紊乱亲疏分散规定三十年续修一次兹距前修限期转瞬届矣如是谋诸各房父老涉水跋山与房长辈同至湘邑老祠多次本意合修全帙继巴山湘水之远源联支分脉络之统系旋以湘邑族势甚旺丁口繁多用费扩大顾我分才财俱弱燕雀不能与鸿鹄齐飞始得自行续集公举堂兄冕纓总其纲纪操其笔墨不数月而厥工告成矣愧未继承先志与湘邑合修然莫为之先则有房伯淡如公分

修于前莫为之继则有先父合集于后为裔孙者熟不若合修之为愈究莫或使之若或使之分与合亦各因其时势便宜使然惟冀我仲福公房后裔文人蔚起仗义积公本本源源亲匕长匕纵使国难临头离乡别祖庶展谱而观亲疏俱载生歿均书寻源而本不紊治丝而绪不乱有所趋向朝宗也至若始祖迁徙原委先人发迹本末前贤老谱罄述详矣无殆赘谈也是为序

裔孙春廓汉初氏谨撰

原叙

黄氏系出江夏派演福建浙江山东徽州常熟洪都宁州双井富州沅江改为远岗又筠阳三县袁州四县及吴掇湾头黄金港钓鱼台湖广之长沙岳州黄州荆州武昌汉阳衡州兴国大冶皆江夏分派者也盖其先由颛顼曾孙陆终受封姓黄至战国时歇公相楚为春申君西汉时次公以太守入相数传至东汉文疆公以孝行博学著封江夏郡公历琮至琬累世簪纓天下知有黄姓者久矣迄唐太宗诏天下奏谱牒退新门进旧望左膏梁右寒微合一百九十三姓三千六百一家而黄氏亦与首称焉其时有滔公者乾宁五年登第任御史諫官正色公任吏部尚书荣公为教授士全公仕柱国大将军金紫银青光禄大夫璞公居荆南玘公居宁州双井琛公居金华珍公居诸暨瑕公居丰城沅江远岗传至宋世元仕公仕翰林院学士九子一婿俱登第为尚书故世称沅江九子十尚书云中理中雅伯仲十子悉登巍科长湜公双井生三子长昭公仕福建漕运官御史大夫次庶公三廉公宋元祐中吏科给事庶公生三

子大临公黔州刺史谪萍乡令庭坚公由神童中乙卯科擢举进士馆选翰林院官龙图阁大学士别号山谷元祐中赠太史后谥文节公叔达公官侍御史昭之子友闻公吏部员外郎中友颜公青田县令庭坚之子相公官大理寺当宋之日双井一门同朝一相二御史九尚书四十八进士其宦业可甚盛后嗣之析居诸郡者能由己祖以邇所自出之祖共成全牒则本支百世之谊不亦联属于无既哉

时

明洪武戊辰

赐进士第出身前礼部观政行人司有功授吏科都给事南昌木山门生魏洪敏顿首拜撰

原 叙

厥初生民莫不各有本源迨其后支繁派远或以百千数或以亿万计至于不可纪极者亦其势所使然也然本厚则叶必崇支虽繁而气类未始不相同源深则流必长派虽远而脉络未始不分明又非理所自然者哉予常翻阅国史暨万姓统纪见吾宗自得姓受氏以来虽世代遥渺而源流世系先谱备悉故不重赘至战国时楚有春申君名歇与孟尝信陵平原同称四君以爱客养士数千人豪于一国后嗣居楚者为最盛至汉有文疆公者产安陆为尚书令出守衡郡封江夏公故吾宗以江夏名郡者昉于此矣历唐至宋代有名人一支迁南昌之宁州地名修口产文节公为宋龙图阁学士诗文与三苏齐名其支派尤甚盛由豫章复迁楚之南北则族类散处于各郡者又不胜纪虽各祖其祖各亲其亲而木之有本水之有源不可不详其从来以究所靡极也岳阳与豫章为邻省而岳属之昌江尤与宁州为最近自山谷一再传而后至朝昌公迁平江之浆市朝汶

公迁九峰朝启公迁三阳凡大石岭黄堂平安视桐
孚石排上桧木坳平田浊水清水牛岗嵌江北街大
州及巴陵白洋等处皆山谷之支派所貽留也今族
姓繁衍欲续刊家谱以上序昭穆下立派行使世世
子孙有所联属不至视如路人意诚美也时则有浆
市食饫于庠者道泰与九峰应试宗人庆纲等三阳
庠生周臣大輦州长华吾邑廩生讳升者同问序于
予予谓欧阳公修谱上及五世因服以袒免五世以
上恐慌远难稽至眉山苏轼其修家谱亦倣庐陵遗
意焉亚圣所谓君子小人之泽五世则亲尽降服今
余遐考周汉迄宋以来非攀援附会也亦犹寻山之
本于昆仑溯水之源于宿海不忘所自耳至若近代
富贵显达赫赫在人耳目间者概不敢忘及昔狄襄
武显于宋人有以梁公遗像谓为远祖者襄武云一
时遭际焉敢自附梁公君子莫不题之至若郭崇韬
之拜汾阳王墓则识者嗤之矣继自今修谱后愿与
吾宗约必入孝出弟以爱亲敬长为大节存忠行信
以戒欺去伪为先务以仁厚礼义为传家久远计且
克勤克俭无骄无吝敦本睦族谦己和邻为要图俊
秀者则诵诗读思以扬名而显亲朴鲁者则鑿井耕

田思以守业而成家由是上可以绳其祖武下可以
貽厥孙谋庶不负镌谱牒之美意亦不负老朽耄年
目昏秉笔作序之愚衷也爰书其言于简端用以永
矢勿諠

时

大清乾隆七年壬戌岁七月二十日谷且
赐进士出身原翰林院检讨加一级

钦赐千叟御宴充两馆纂修官

特授都察院御史前翰林五庶吉士东陵年八十
有五宗人讳秀字实庵号道山题于岳阳之雪鸿轩

男丙辰科举人候选知县文璨瑯轩

癸卯科举人揀选广西知县文琮又遽

丙辰科举人壬戌明通榜进士候知县文理在中
同校字

原叙

谱也者原所以序昭穆明尊卑使祖若宗之名昭然于千百世后而不朽其典何甚重也吾族自陆终受封以来传至战国时有歇公号春申君者为楚元王佐与魏信陵赵平原齐孟尝称为四君后至汉文疆公以孝行著封为江夏郡公生子琮征为议郎琮之孙征拜少府又为豫州牧后封关内侯名琬者其声名莫不洋溢于往古划然于谱牒中也及宋中理子官散大夫名湜者有子庶为大中大夫庶子庭坚后号山谷道人谥文节公者有子相官中奉大夫而生熙其声名愈著焉自熙生朝汶公至迁居九峰四传而至晨生子八遂有丙一丙二丙三丙四丙五丙六丙七丙八之名而吾族即晨之长子丙一之后裔也而丙一公五代孙名孟八者生思礼思熙思成思才及思礼生宗荣荣生益秀遂迁巴陵而居之焉而孟八次子思熙生宗忠宗受宗文俱迁昭山长子宗忠居湘阴营田二十四都即今南林冲与磊石塘等处之祖派也乾隆九年金父与房伯宅族兄世厚至浆

市三阳诸处合众族而创修全帙迄今得以随流溯源因根寻枝使千枝尤派一一清晰焉而不混金奉父命至湘邑湘邑宗先生有次山孔学英才香也合族人等同心义举云全牒一时难以即修而命予将支谱查明清录以俟后之人世守于无既是亦不忘水源木本之意也金不揣疏陋约略一述之是为序
大清乾隆三十六年辛卯岁仲秋月吉旦

丁卯科举人截取知县讳升长金顿首撰

原叙

盖闻一本而统乎万殊万化归源于一理是以水宗宿海古人每乐穷源山祖昆仑先辈尝为探本矧夫门推甲第忠孝攸传世衍丁男箕裘丕振既阅世以生人诂抚今而忘昔方今

圣天子仁育蒸黎恩覃庶物萃五方而报版典役三年合九土以算民期张八月夫蓬芦花户既册载于天朝竹祖桐孙应名留于家乘原夫谱之修也所以溯源笃雍睦欧阳子有世系之录苏眉山有谱牒之刊良以片纸所存万龄不朽虽红羊劫老不淆奕叶之亲疏纵沧海田更可识株连骨肉又况人之生也无形不朽有物必穷勋名似春梦之耽富贵如秋风之过莺迁异域而家起天南或鹤化他乡而魂飘地北赖兹楮墨之留聊当首邱之义谱之所系岂不重哉忆我族自颖川衍庆食旧德而服先畴迄江夏发祥披朝华而起夕秀滔荣全璞列祖簪笏唐廷干裳璃洽诸公衣冠宋殿然强宗难恃倾于子姓之奢顽华胄何常始自门庭之孝友但人丁蔚若而谱牒阙如自乾隆辛卯岁长派所修距道光癸巳年芳派

已盛纪岁将近百年论世亦经六代试问生辰冥诞
半属烟消岂无肖子贤孙同归匏落兹者诸族尊辈
履霜怀旧饮水思源以谱未镌修举翔为手集于是
大宗小别倣古法以编薄错节盘根效先型而缉柳
尤乃鲁鱼焉马终日搜罗抛来夏扇冬裘连年考究
珠联鹭序无非追先世以汗青珍重薪传敢谓树后
人之帜赤独是门旌义字宋陈竟十八代犹悉同居
郊听麋声周尹氏数千口曾偕共食虽吾族不斲箴
规即他族亦可为权量义田义学宜倡置而倡修给
粟给金理周亲而周急砥行曾三顔四毋学于偷飭
躬禹寸陶分勿归于惰莺声虽巧难疏友爱之雁行
虎榜非奇原自磋磨而豹变凡兹族类愿共勉旃谨
掇芜词不揣谫陋而为之序

时

皇清道光十四年岁次甲午仲秋月中澣谷日

裔孙楠村萃翔鸿翥氏谨识

原叙

尝谓莫为之前虽盛弗彰莫为之后虽盛弗传余窃味乎其言矣祖父联芹公于道光甲午岁与湘阴南林冲合修族谱迄今五十年矣族老以重修责余且谓全牒一时难修不若各镌本支为便以余沐先人余泽稍识诗书谱之修祖述孙承亦固其所第余于湘阴先人之祠宇在焉神主在焉坟墓在焉若分修于先人何也吾弗为而族老曰否匕子特知其一未知其二也前修多历年所而故老仅有存者其继启又不下四百余丁生辰冥诞几不可复识且湘族甚盛续刊之议数年未定不识后此为奚若也非子读书人责乎如子所言祠宇之或朽同补葺之神主之祭祀依然坟墓之拜扫依然且已捐田供先人晨昏香火是举也于先人乎何愧无子乎何尤吾于是退而思其说不禁有匏落音沉之懼而动露零霜降之感焉遂与我读书輩慨然身任其事披阅旧谱吾宗陆终公受封以来源流世系前人之述备矣何容再赘

至宗忠公由平江九峰居湘阴营田琴公迁南林冲数传后仲福公始徙巴陵即今所居地而吾族以帝元名者帝元吾之太祖也族至是始大故云今镌谱宜以仲福公为一世而又始金科公者盖其父也以金科止生仲福划然为巴陵一支与湘阴别由金科而上溯陆终下逮芳派因流溯源俱条分而缕晰焉继自今昭穆分尊卑等父子亲长幼序士食旧德农服先畴则先人盛德之彰夫固传之永久矣其他支仍存旧谱而世守勿替后有作者倣吾祖父手泽与湘阴合修全帙又吾之所厚望也夫是为序

时

皇清光绪八年岁次壬午季冬月吉旦

裔孙邑庠生菊萃均谨识

原叙

我族自江夏蜚声历汉唐宋元明皆数典昭然克绵其绪厥后有曰宗忠公者由平江九峰迁居湘阴营田越再传翕庭公迁南林瓦子塘又五传仲福公于嘉靖间乃谋再徙巴陵十三都下河塘里即今落业之地是也而谱牒之修则自道光甲午年经楠村公纂辑于时民风近古人物熙雍椒衍瓜绵珠联璧合地则巴山湘水三十里非遥谱则玉简金枝百千祀永固煌匕乎昭其盛也逮光绪壬午适我房草创支谱至乙酉湘邑因之分修族之父老兄弟往往念及前事至有垂泣涕而道之者无他顾瞻梓里缅想先型觉苍茫云树中前人之邱墓在焉祠宇在焉祭祀挂扫克期有必赴焉而谓谱牒之修可分而不必合乎即愚不肖者亦必不谓然矣嗟夫此淡如湘玉两兄所为抱分修之谱而恧然生感重有待于其后也今距乙酉之修历年三十淡如兄下世又数年矣使不及吾世而合修之恐再历数传几何不视同行

路有两不相关繫也乎予虽不敏少沐诗书之泽幸
附诸族尊长末赞襄厥事非敢曰有光前哲实期无
愧乃心传曰尊祖故敬宗敬宗故收族愿与后之读
此文者世世守之勿替云

中华民国五年丙辰季春月中澣谷旦
十五世裔孙润兰萃谄谨序